

PENGARAH VETERINAR PALSUKAN DOKUMEN UNTUK TUJUAN NAIK PANGKAT

Hadapi Tiga Pertuduhan Rasuah dan Empat Pertuduhan di bawah Kanun Keseksaan

“GEJALA PEMALSUAN DOKUMEN MELIBATKAN AGENSI KERAJAAN DAN SWASTA BOLEH MENDATANGKAN IMPAK NEGATIF KEPADA KEHARMONIAN DAN KESELAMATAN MASYARAKAT”

Datuk Seri Mahmood Adam,
Ketua Setiausaha Kementerian Dalam Negeri (Berita Harian, 20 April 2012)

Memalsukan dokumen untuk kenaikan pangkat agar mendapat emolument yang lebih banyak merupakan suatu tindakan yang mencemarkan maruah dan kredibiliti seseorang penjawat awam. Perbuatan ini seharusnya tidak berlaku dan pelakunya wajar dikenakan tindakan yang tegas.

Siasatan bermula setelah SPRM menerima maklumat mengenai kegiatan memalsukan dokumen oleh seorang pegawai kanan di Jabatan Veterinar Negeri Sembilan untuk tujuan kenaikan pangkat dan pelarasan gaji serta elaun.

Hasil siasatan mendapati Pengarah Veterinar Negeri Sembilan, Dato' Dr. Noor Soeraya Norsham telah mengemukakan beberapa dokumen yang mengandungi butiran palsu untuk membolehkan beliau dinaikkan pangkat dan mendapat pelarasan gaji serta emolument. Dokumen yang dipalsukan adalah:

- Surat Arahan Kenaikan Pangkat dan Pengesahan Jawatan Pegawai Veterinar Gred G48 yang menyebabkan beliau mendapat pelarasan gaji dan elaun sebanyak RM 39,536.90.
- Surat Arahan Memangku Jawatan Pegawai Veterinar Gred G52 - Khas Untuk Penyandang (KUP) di Jabatan Perkhidmatan Veterinar, Kementerian Pertanian dan Industri Asas Tani yang menyebabkan beliau mendapat pelarasan gaji dan elaun sebanyak RM5,013.82.
- Surat Keputusan Urusan Kenaikan Pangkat Pegawai Veterinar Gred G48 ke Gred G52 di Jabatan Perkhidmatan Veterinar, Kementerian Pertanian dan Industri Asas Tani yang menyebabkan beliau mendapat pelarasan gaji serta elaun sebanyak RM5,764.86.
- Surat Keputusan Pemangku Pegawai Veterinar Gred G52 ke Gred G54.

Pada 17 Januari 2012, Noor Soeraya dituduh di Mahkamah Sesyen Negeri Sembilan atas tiga pertuduhan di bawah seksyen 18 Akta SPRM 2009 dan empat pertuduhan di bawah seksyen 471 Kanun Keseksaan.

